

REGIONAL NEWS

HEADLINES:-

1. Mizoram State Assembly Inthlanpui chu November Ni 7 ah neih a ni dawn a, December Ni 3 ah Vote chhiar a ni ang.
2. Mizoram inthlanpuia vote chhiar hun chu Pathianni-a a tlak avangin Mizoramah helh tu an tam hle.
3. Prime Minister Narendra Modia chuan vawiin khan Tanzania President Samia Suluhu Hassan nen New Delhi-ah an inkawm
4. Israel leh Hamas te indona avanga thi zat chu mi 1100 an chuang.

<><><>

ELECTION STATE

Mizoram State Assembly Inthlanpui chu November Ni 7 ah neih a ni dawn a, December Ni 3 ah Vote chhiar a ni ang.

Inthlanpui vote thlak neih hun hi vawiin khan Election Commission of India-a Chief Election Commissioner Rajiv Kumar chuan a puang a, Mizoram rualin Chhatisgarh, Madhya Pradesh, Rajasthan leh Telangana te Assembly inthlan hun puan a ni a.

Mizoram State bikah October Ni 13 hian inthlan hriattirna tihchhuah a ni anga, chuh tumte tan hming thelhu hun tawp ni chu October Ni 20-a ni anga, October Ni 21-ah hming endik a ni anga, inhnukdawk duh tan October Ni 23 thleng hun hawn a ni ang a, Inthlan Vote thlak Ni hi November Ni 7 ah neih a ni dawn a. December Ni 3 ah Vote chhiar a ni ang.

Mizoram-ah hian vote nei mi 8,51,895 an awm a, Inthlan hnukung ber aia vote thlak thei tam na hi vote 83,714 a ni a, kum 2018 khan zaa 81.61 in vote an thlak a ni.

Vawiin vek khan Mizoram CEO Pu Madhup Vyas chuan Press Conference ko in Media-te chu inthlanna felfai leh dik neih a nih theih nana tih tur leh tih loh turte a tam thei ang ber puangzar turin a chah a. MPF leh NGO dangte'n election muanawm leh felfai tak neih kawnga theihtawp an chhuah thin chu fakawm a ti a. Mizo mipui vote nei tawh phawt chu vote thlak theuh tur leh vote thlak thatna ber ni tura thawhpuiah a sawm a ni.

Mizoram CEO chuan ECI-in Vote thlak hun a puan velah atangin Model Code of Conduct chu hman tan nghal anih thu a sawi a, Political Party zawng zawng te leh Sorkar Officer te pawh Model Code of Conduct hnuaiah hian khuahkhirh an ni a. Voter te duhthlanna ti buai thei zawnga chet lakna chi reng reng chu khap a nih thu a sawi baw.

Pu Madhup Vyas chuan sawi danin Addl. CEO kaihruai State Level Media Cell din niin District tinahte kalpui a ni a, Election Official-te tan training hrang hrang kalpui a ni a ti baw a, Vote a tlak that theih nan SVEEP kaltlangin zirtirna kalpui mek niin EVM leh VVPAT First Level Checking zawhfel a ni a, Ballot Unit 2035, Control Unit 2018 leh Voter Verifiable Paper Audit Trail (VVPAT) 2021 te inthlanna atana hman turin venhimna khauh tak hnuaiah kawm mek a ni baw.

<><><>

COUNTING DAY REACTIONS

Election Commission of India in state 5-a vote chhiar hun a puan December ni 3 chu Pathianni anih vangin Mizoramah helh tu an tam hle a, sawn tir tura rawtna MNF leh Congress Party in ECI ah an thawn nghal.

MNF Party thuchhuah tarlan danin Mizoram Legislative Assembly Election result chhiar hun atana Kristiante ni bik, Pathian biak inkhawm ni tak a ruat chu tha an ti lo hle a, Mizo kristiante palzutnaah an ngai tih sawiin Chief Minister Pu Zoramthanga rawtna angin vawiin khan Chief Election Commissioner, Election Commission of India hnenah Pu TC.Kaphmingthanga General Secretary, MNF General Headquarters hmingin sawn dil turin an thehluk tih an sawi.

Mizoram Pradesh Youth Congress Committee (MPYCC) chuan, Election Commission of India in Pathianni-a MLA General Election vote chhiar tura a tih chu an duhlo takzet a, vote chhiar ni hi sawn leh ngei turin Election Commission of India an phut tih an sawi a, bawk.

Congress Party chuan thuchhuah siam nghalin Vote chhiar ni atana Kristiante ni pawimawh Pathianni a ruat chu an duhloh thu an sawi a, Election Commission hnenah an duhlohzia na takin an thlen tih an sawi bawk.

Mizoram Synod Moderator Rev Dr C. Chawngmingliana chuan Mizoram inthlan result puan hun Pathiannia a ruat chu tha anti lo hle tih sawiin hemi chungchangah hian Mizoram Kohhran Hruaitute Committee thutkhawm chu naktuk zanah koh nghal a ni a ti.

He ni hi Kristian te tana ni pawimawh tak Bible sunday niin hmun tinah hun pawimawh tak a chang a, Kristian te tana ni pawimawh Pathianni ah inthlan result puan chuan a kaihnawih zawng zawng inkhawm theilo tur leh hnathawk tura chhuak tur te tan a harsat a rin thu a sawi a, Election Commission hnenah an duhlohna thlen ngei an tum tih sawiin Mizoram mai ni lo state danga Kristian te pawhin harsatna an tawh phah a rin thu a sawi bawk.

<><><>

MERI MAATI MERA DESH

India zalenna kum 75-na lawmna pual a 'Meri Maati Mera Desh Campaign' kalpui chu chhonzawm zel niin vawiin khan Lawngtlai DC pisa tualzawl ah Lawngtlai district chung a khaw hrang hrang atanga lei lak te chu chhunkhawm a ni.

Heng lei lak khawmte hi Karavya Path hmun ah Martar-te Huan,'Amrit Vatika' siam nan hman a ni dawn a, Addl. DC Pu Abraham Beirazi Khithie chuan thangthar ten zalenna hlutna an hriat chian deuh deuh theih nan leh mi tin thinlungah ram hmangaihna leh inpumkhatna tha siam a nih zel theih nan 'Meri Maati Meri Desh Campaign' chu kalpui a nih thu a sawi a. India ram chu hnam, tawng, khawsak phung leh ziarang in ang lo tak tak chenna ram ni mah se ram pakhat a cheng ho an nih angin inpumkhatna leh inlungualna tha tak neih a pawimawh thu a sawi a,

He hun ah hian khaw hrang hrang atanga lei lak khawmte chu Pu Abraham Beirazi Khithie, Addl. DC chuan Block Development Officer-te hnen atangin lo dawngin hmun khat ah dahkhawm a ni.

Heng lei lak khawmte hi Aizawl ah thawn pheih tura ruahman a ni a, Aizawl atangin Mizoram hmun hrang hranga lei lakkhawmte chu Martar-te huan, Amrit Vatika siam nan Delhi-ah thawn thlak a ni ang.

<><><>

CYMA

Vawiin khan Manipura Zofa pawl hrang hrang khaihawm tura din Zo United hruaitute chu Central YMA Office ah lengin an hmalak dan te CYMA hruaitute an sawipui a, Central YMA chuan Manipur tualchhung buainaa Zo United hmalakna atan cheng nuai 20 an hlan.

Zo United hruaitute hian Manipur tualchhung buaina avanga Zofaten harsatna an tawh chungchangah Zo United in hma an lak chhoh mek dan te an tarlang a, Zofa pawl hrang hrang te lungrual taka an kal thu leh inpumkhat zelna tura theihtawp an chhuah thu an sawi.

Central YMA President Pu R. Lalnggheta chuan Zo United hmalak chhoh dan leh Manipura Zofa unaute zingah inpumkhatna a awm zel avanga lawmawm a tih thu a sawi a. Central YMA chuan tanpui an ngaihna apiangah theihtawp an chhuah zel tur thu a sawi bawk.

<><><>

RTI WEEK

Right to Information (RTI) Week pualin vawiin khan Champhai DC Conference Hall, Keifangtlang-ah hman a ni a. Champhai DC Pu James Lalrinchhanan a hmanpui.

He hunah hian Champhai District Head of office te, SPIO leh SAPIO, Champhai MJA hotute, Champhai Sub Hqrs MHIP, YMA leh MUP hruaitute an tel a ni.

Champhai DC & District Appellate Authority Pu James Lalrinchanna chuan mipuite rorelna sawrkar (Democracy) leh RTI chu thil kal kawp tlat a ni a ti a, Sawrkar hmalakna leh hnathawhte hriat chu khua leh tui te chanvo a ni, a ti a. He Dan hi anih tur anga hman tangkai anih theih nan RTI hnuai mawhphurna fawng chelhtu SPIO leh SAPIO-te chu he Dan hi lo in zirchianga, a hun bituk chhung ngeia information pe chhuak thin turin a chah a. RTI chu India khua leh tui zawng zawngte tana dikna chanvo pawimawh berte zing ami ani tih hre thar leh turin kalkhawmte chu chahin, mipui puih duhna rilru pu tlat chungah RTI zawhna te uluk taka chhang thin turin a chah a. He Dan hnuai chetlak dan tur chungchangah hriattiam loh leh hriatchina duh an neihte chu District administration-ah emaw Mizoram Information Commission lamah inthlahrung lova zawtfiah thin turin a chah a. Mipuiten sawrkar atanga an hriat duh apiang an hriat theihna hmanrua RTI hi langtlang sawrkar siamna tura thil pawimawh, sawrkar khalh ngiltu leh sawrkar tha siamtu hmanraw tangkai tak a nih avangin Champhai District mipuite chu RTI hmang uar deuh deuh turin a chah a ni.

RTI Week hi October 5- October 12 chhungin ram pumah hman a ni a. A lawmna pui ber chu Aizawlah neih niin District Headquarters tinah he hapta chhung hian RTI Act pualin hun an hmang vek dawn a ni.

<><><>

NGOPA CLEANLINESS

Vawiin khan Ngopa kawtchhuah ah Mizoram Sawrkar in Mizoram Cleanliness Competition buatsaih chu hawn a ni a,

He hunah hian Faina Thutiam te neiin, zirlai te leh khawtlang leh NGO pawl hrang hrang te an tel a ni.

Saitual SDO Civil Pu H Lalramliana chuan Ngopa khua chuan faina an ngaih pawimawh zual zel a pawimawh a ni, a ti a. An fai hle chungah anmahni aia lawmman dawng tlak zawk khua tamtak an awm anih pheih chuan Mizoram chu a changkang hle tawh tihna a ni dawn a, chuvangin, hmun tihawktu ni lova, an kalsan hmun apiang fai taka kalsan zeltu an nih a pawimawh a ni tiin mipui

kalkhawmte chu faina kawnga nasa lehzuala mite entawn tlaka thawk turin a chah bawk.

<><><>

PM MODI

Prime Minister Narendra Modia chuan vawiin khan Tanazania President Samia Suluhu Hassan nen New Delhi-ah an inkawm. Ram pahnih hruaitute chuan India leh Tanzania thawhdunna hrang hrangte an sawiho a, tun aia thuk zawk leh lian zawka thawhdun dan tur an rel a. Hei bakah hian ram pahnih sawrkar aiawh mi pawimawhte vawiin vek khan inbiain sumdawnna leh investment lamte, ralthuam leh tuipui lama invernate, zirna sang zawk leh mipui inpawhna lamah te thawhdun zel dan tur an sawiho a ni.

Prime Minister Narendra Modia chuan Tanzania President nen thuchhuah intawm an siamah India-Tanzani ten hun rei tak inthianthaa an lo thawk dun tawh chu lawmawm atih thu sawiin Strategic Partnership ah hlankai an tum a ti a. Africa-a India thawhpui hnaivai ber chu Tanzania a ni a tibawk..

<><><>

ISRAEL - HAMAS

Israel leh Hamas te indona avanga thi zat chu mi 1100 chuang an tling tawh a. Gaza-a cheng mi nuai 1 sing 2 sang 3 chuang an tlanhhia a. United States chuan Israel pui turin indo lawnglian leh fighter jet a tirlut tawh a ni.

Vawiin khan Israel sipaite hian Gaza strip-a Hamas awmna hmun 500 chuang an kap a. Hmun tam zawk an thunun leh tawh niin Israel sipaite chuan an sawi a ni.

<><><>